


T5453/4414(1)

CHINESE LIBRARY
HARVARD-YENCHING INSTITUTE
OF HAWAIIAN UNIVERSITY
FEB 5 1966

心遠堂詩集

一





序

哈佛大學漢和
圖書館珍藏印

詩以言乎其志也三百篇中貞
臣孝子勞人思婦之什多矣乃
其托物寄意則莫不若如其
志之所之而止楚騷以後詩體屢
變而作者益衆然其志之存

乎內者有大小故其詩之數
乎外者有醇疵譬之範金
而為鐘釜金一也而鐘釜之聲
不同焉豈非以其器質之所成
者有異則音響之所出者必殊乎
聖代開天

世祖章皇帝當經綸草昧之時
投戈講藝而高陽李先生乃
振其門風出其家學以起而應
之侍從

宸遊頌揚宸著及

今上御極論思綸扉之中者又十餘

年每逢

賜予宴饗輒爾賦詩紀恩

主聖臣賢真所謂千載一時者矣
夫先生事業之光昭功施之
久大史冊書之鼎彝銘之姑
不具論而茲則尚論其詩詩

者性情之事也作者吐性情于
楮墨之間要須以渾樸沉雄之
氣載其忠厚和平之言開天地
之光華鳴

朝廷之休豫斯足貴耳若但雕風
鏤月問水懷山則詩者祇為玩

物娛情之具而豈所以為教也哉
唐之東野閻仙諸人皆負詩名
於世然而幽僻蕭瑟率皆爭
竒於冷淡寂寞之字句故後
世之論詩者多以郊寒島瘦為
病而宋人葉適之言亦曰為文

不關世教雖工何益今觀先
生應


制諸篇以及唱酬題咏之作宏音
亮節具有殷然忠愛藹然敦
厚之思固宜其藻煥

皇猷漢訓同垂也昔范文正公為

序四
有宋一代賢相而識者蚤定於
先夏後樂之一言然則讀先生
之詩者可以知其志之所在也夫
可以知其志之所在也夫時

康熙辛亥陽月既望始安李棠

拜手謹識



序

高陽先生詩集十卷當世仰望而恨
不能盡見也暇日偶以示禾禾請壽
之梓不得已授焉且命贅言於後因
再拜卒業吟哦徃復窮日夜之力不
能窺見萬一而惟覺意旨之深訓辭
之厚瀉古大雅卓然一代之元音也
先生自翰林登政府佐

世祖皇帝致治太平其顯而可見者典章
文物聲名度數煌煌昭代之制作從
容廟廊之上而天下安如泰山功德
在當世事業在史官先生且有而不
居退然若未足至於詩文之事固視
為文士之末務尤不欲以示世然自
開國以來文明大啓至於今垂三十
年朝野犁然嚮風原其始則自

世祖皇帝鼓舞興起於上而先生首被知
遇凡國家大著作如典謨訓誥懸於
日月之際至於應制詩賦流傳人間
自是學者知所依歸而羣焉稽古迨
於

皇上又以經術啟沃崇儒右文承學之臣
彬彬盛美莫不以先生為折衷此先
生之文章為氣運所關而開風會之

始蓋自主臣同德棧樸作人而致今日之盛非苟然也夫事功之與文學兩者恒不能兼或兼焉而未為盡善往々相並而論以蓋其短至於先生語事功不必有文學論文學不必有事功何其全德備美乎蓋先生所體者道而已道則無所不貫根本深而成就大時而措之裕如也古之大臣

弼諧其君訓飭有位以及采風問俗導揚德化皆於詩乎發之先生之詩雖一咏一言無非忠君愛國之意蓋藹然雅頌之音和五聲平八風格神人來率舞將欲使在朝有鹿鳴天保君臣相敬愛之情草野有豸首騶虞小民相揖讓之俗此固先生所以答兩朝之恩而愬愬欲致於斯世者夫先

生於時可謂大行其道矣而其言猶
若不能盡適時有睠懷山林棲遲丘
壑之願此則非予小子所能知也所
可知者先生之道既已佐致治平而
以餘事為文章又專詣獨至雍容大
雅開本朝渾融磅礴之氣俾後學
羣歸而成太平之治象此即
世祖知先生之深而

皇上所以用先生者大豈風雲月露感物
懷人之作可同日而語哉禾於門墻
為下士安能仰贊高深而先生之立
身行已為中外矜式故其道德文學
實可示天下後世而無媿辭且幸附
名末簡以傳於無窮也謹序

康熙十年歲次辛亥十月望日江上受
業曹禾百拜識

卷之五

五言律詩一百一十首

卷之六

五言律詩一百五十五首

卷之七

七言律詩一百一十一首

卷之八

七言律詩一百二十五首

卷之九

五言排律一十五首

卷之十

五言絕句一十七首

七言絕句一百一十三首

附

詩餘一十三闋

心遠堂詩集卷之一

高陽李蔚臺書著

男其
凝校

五言古

郊居卽事

乙酉

中夏暑猶薄晨光引遐矚夜雨濕邨烟四野皆新浴
萬樹靜微風平疇凝一綠遙田當我樓可以時寄目
鷄豚識原塋烟火辨茅屋策杖羨老農蚤起察種稔
悠哉天地意萬化於此足

哈佛大學漢和
圖書館珍藏印

秋日

朝出城南門秋氣相侵凌郊原一蕭條百草愁不勝
豈無時序悲所慰禾黍登微生固有分其敢忘夙興
賦得秋菊有佳色
三首
丙戌
微風帶霜氣着我庭樹枝如何桃與李坐失三春姿
睠焉東籬下寒華自葳蕤棲息忘物我歲暮同襟期
采采置懷衷道遠何由知

其二

秋菊有佳色灼灼君子庭豈曰耳目玩共勗雲山情

勁風走落葉百卉何凄清咄此不足悲昨夜鸚鵡鳴
趨踰長安塵媿我多浮名日暮幽窗下魂魄聊依并

其三

日夕坐前軒陶然醉孤興有酒時自斟愜此黃花徑
忽聞歸鴻鳴四野秋聲應感之罷壺觴寂寂青燈暝

秋感雜述

十二首
戊子

西風何方來一夕改庭柳代謝既倉卒炎炎詎堪久
大火拂雲漢商吹生林藪寄言桃與李芳華非君有

其二

斜陽正鳴蟬低徊去霞影耳目遂淒迫孤緒如有儼
遠礎滋舊憶泫露有餘靜恭惟古喆人此生以爲寤
嘗恐日淪棄矜踈失所乘買山笑豈免臨淵羨徒耿

其三

四氣遞生殺所任暑與寒隕霜死百草曾不遺蕙蘭
大運一以傾愚哲寧殊觀身世兩相委落葉隨驚湍
下士逐憂樂戚戚不自安胡不探物化榮悴固有端

其四

銜悲倦危坐步眺出郭門所悲諒何爲節候臨中元

時俗展哀慕傾城事丘墟富者刲羊豕貧者羅盤殮
親疎雜歌哭兒女相慰存西風暮淒緊紙灰高飛翻
喪亂近廿載干戈殫乾坤郊野足白骨爨爨生雕垣
觸目但蒿藜狐狸啼空邨鬼聲沸昏夜半爲兵死魂
號號敢爲厲尚痛其子孫皇天未厭旤四海仍崩犇
念我先塋兆遠隔三寒暄僅能免樵牧誰爲治醜藩
栖栖走微祿塵網阻歸轅惻怛履霜露生我豈無恩
其五

啁噍夸毗子磬折事要津一笑或相假不惜辱其身

燄冷利亦去旣釁發所親今日操戈者昔日彈鋏人
閉門謝結納白首幸如新

其六

鷄鶡止魯門神悸饗鐘鼓於越文身邦舉俗笑章甫
物情安所習驚衆乃招侮從來達識者和光在塵土

其七

中庭雙紫薇光蕤夏及秋誰使花不實歲晚成沈憂
結條未堪贈委砌無人收美人感幽獨坐對西風愁
我生同物化芳妍詎相借况復白露時單衾怨遙夜

其八

苦竹亦有節寒菊亦有芳哀此簷際花蕭撼菱嚴霜
物性異貞脆順受固其常奈何末世士局促失行藏

其九

鸞鳩時鼓翼搶榆未能勝栩栩有其樂不羨南飛鵬
一枝已云足六翮敢自矜卑棲得所性豈惟逃罔矰

其十

驅馬故城下烏鳶翔空壕敗屋絕烟火蓬艾如墻高
黃塵埋斷碣遺名認賢豪嗟彼中澤鴻啼飢聲嗷嗷

徒知振長策計晚思補牢

其十一

壤垣乃揖盜智子疑其隣言同異功罪豈不以疎親
巫咸杳已遠黻黼當九閭咄咄草萊士所志何由申

其十二

繁霜錮地脉凝陰陽氣窮落葉積庭廡枯條鳴北風
田家歛農器羣務皆休工悄悄念終古有愁無由通
舖醕以諧世崎嶇違深衷

立春日雪

庭樹啼早鳥虛窗夜疑旭敝裘不堪擁稜稜起寒粟
時當歲星改日馭旋東陸田家脊節候陰晴職豐縮
兵氣徵驕陽天心失寒燠兒童傲冰霰趨走輕顛覆
科頭坐清曉炊烟靜茆屋

寄懷紫淵

巳丑

昔者喪亂初生民付刀弩上國封豕張白日狂魑舞
鄙夫方多思抑揄坐相侮論交半狙詐齷齪不足數
孫郎好晁弟肝腸歷可睹束髮事鉛槧俠名噪寰宇
相遭述世惠源自先父祖落落杯酒間身世悉覩縷

媿予走微祿局踏墜塵罟書來不誚讓知我憂貧窶
新詩寄又多詞清意深苦愾然問天帝豁爾發聾聵
鷓鴣羞被嚇赤霄刷毛羽誰植金琅玕縱遊過懸圃
以子貢明廷四方息噢咻笙鏞諧大樂圖書盛文黼
卽今陽和轉天心照林莽百草以時坼懷抱豈終阻
徒望雲外山復憶耕前雨何由倒樽壘相携醉花塢

春日遣興 三首

滾滾長安塵驪驪策高足仕宦無中人壯夫亦空腹
聲利易結交朝昏自相逐裘馬照中衢觀者皆側目
別有執戟郎閉閣窮倚伏

其二

冰雪氣漸遠頗覺天宇和西望斂朝烟峯影晴翠多
社燕葺故壘庭樹振柔柯羣動紛自適我寧憂虞羅
白眼向今古浩浩一長歌

其三

淵明無酒資勉爲州郡仕束帶見督郵豈復能堪此
解組不終日大笑歸鄉里有田盡種秫自釀幸多旨
三覆五柳文千年照清泚頗怪杜陵翁枯稿何輕訾

孫孺人節烈

陽九歲沿灘支祈沸坤軸天紐紛不張猗噬迷川陸
難作一夫橫事去百靈哭屈膝多公卿貫死餘骸鯨
咄咄閨中質忼慨氣無縮寸心乃霜明大節亦嶽矗
嚼然蘭雪姿千春挹清馥恤緯誠何心聊用媿食祿

酷暑

酷暑絕經過長晝獨閉門炎飈時颭颭吹我几席溫
日車停中天萬物同炙燔飛鳥隼其羽池流爲之翻
畏景苦難暮欲寐氣鬱昏已憎團扇重頗覺纖絺煩

傷彼道傍子簇聚如雲屯揮汗事畚鍤萬指相攀援
觸熱豈不憚嚴箠莫可奔一身飢且暍舉室悲游魂
使民有恒期師行避煇燉茲役矧可緩胡令多銜冤
浮埃蔽上蒼雲雷久無恩安得生羽翼憤激爲叩闥
我居幸閒逸湫溽何足論

積雨秋夜讀書有懷田里

幾日碧蘚合客庭閒且肅溼雲低護簷飛雨涼濺燭
永夕幸無營開卷破幽獨息念攻羣疑觀生驗早服
四年隔鄉園五畝荒穉稑今秋霖潦過奔流瀦平陸

漁舟載戈鋌焚殺及茅屋况復煩撻伐無地安樵牧
遺壘烏鳶肥空村狐狸哭理亂如相周天心豈難卜

詠史

紛紛七雄時宗周若旒綴世主醉富強人心死功利
禮賢徒虛名賤土工游說從成則楚王衡成則秦帝
山東實齟齬傾詐爭自弊相割委強秦弱肉恣狼噬
吾愛張孟談曲折存趙計吾愛魯仲連卓犖挫秦勢
排難辭成功羞爲浮榮繫長嘯懷若人千秋氣凌厲
季子多黃金徒傷身後裂

漫興

露結庭始寒木葉稍欲脫夜長秋分後待旦渺難達
欹枕聞嚴更栖鴉冷相聒枯蕉集微雨蕭森涼氣闊
勞生竟何成歎息時已末諒無羽翼期瑤華安可掇
懷哉滄洲人晤語庶當豁

九日登歸義寺閣

日月協陽數嘉名昔共珍客懷非一感睠焉追同人
野逕入幽寺地偏趣易伸高閣豁遠目物態一何新
風日午方暖雲木秋逾真澹蕩衆山色蒼莽九衢塵

爲歡幸簡率盛氣無逡巡誰能愛清醒坐負百憂身
初冬 二首
招搖適臨亥凝陰稍已勁墮戶當前期蓄旨代爲政
屋霜曉來白籬菊枯餘靚生意在嚴殺百族終於正
理亂或如此浩焉觀大命

其二

候肅羣木落濃霜封其條北風時撼之中夜鳴波濤
感此不成寐啟戶披緼袍缺月在屋脊兀兀明星高
隣鷄警初寒未曙已三號咄爾乃何知頗似吾生勞
迴合四氣中寒暑安可逃

贈易隱劉君

名養貞蜀人

百川潰四極白龍預且困運窮天地閉君子亦肥遯
飢鴉饜腥穢昂首嚇鷓雛時命苟不會紆鬱摧良圖
夫子康濟姿早具出世骨才湧錦江流神鑒峨眉月
劫來長安市垂簾論幽精委心任元化埋照窺虛盈
胡盧眼中人塞耳蒼蠅聲舉世莫能識浪呼嚴君平
君髮已種種君心乃浩浩勿學魯連子東海未可蹈

哭濟寧李逸羣先生

庚寅

乙酉秋八月邑里初罷兵賤子苦謀食挾策遊上京
是時喪亂餘百務皆廢傾矧此鉛槧業迂僻遠人情
多士稍稍集黽勉入貢場山東李夫子分校司文衡
榜發乃叨薦果出其門墻爰從同門後始得覩儀光
公德如海嶽勺躋莫可量鄙野乃驟變薰陶賴包蒙
及予告歸時拜別招提中公意甚珍惜道義重勉襄
出門當仲冬北風慘衣裳計予方抵里公亦授巖疆
迨乎丙戌春予獲售南宮書札寄自淮愉悅盛期望
清河古泗地疲劇當河衝公才有餘刃擘劃無不臧

左右簿領間砥淬道彌精亥子冬春交臺諫需才良
當宁軫守令銓府奏公名應召始北轅清民涕浪
浪由是躋兵垣是冬 郊禮成解澤沛宇內畿南命
公行捧 綸不崇朝德音備宣揚明年四月半竣職
報大廷馳驅察道途凋瘵憫遺昨賦繁有司暗論列
首其鄉奏入得 俞旨切責期均平未幾公移居予
舍共一坊相去僅數武時時得過從公最慎交遊予
至則命觴嘯咏必終日名理同品評暑雨破岑寂聞
堦愛幽涼頗嗜熊鳥術吐納神康強七月感脾疾予

爲薦醫生公疾屢小愈人事復見妨鞅掌不可辭浸
淫再羸疔靜攝益謝客予獨造寢牀公無婢御侍藥
餌惟予商歲朝喜和霽起步坐前廊神貌愈清炯謂
可復健王首春過人日候疾達公房欣然語之坐茗
酒勸予嘗肢體雖委頓議論更肫詳劇談迄日夕憺
別情慙傷豈料遂永訣轉瞬殊哀榮易第當上元奔
胝已殂升未及聽遺訓擗搶莫自通一子哭躑躅二
僕走竄竄旅邸無長物周身具蒼黃故鄉千里外痛
惻感路傍矧於及門士能無摧肺腸公性異流俗名

行夙端方土苴祿與位恬處無兢容出口絕臧否物
我已兩忘大道腹羣倫達識齊彭殤所抱未竟施不
慈悲彼蒼丹旆出郭門返魄濟北塋哀哉申此詞引
領雲茫茫

夏至

茲晨斗指午日馭窮北垓陽極陰事起火王金已胎
炎涼迭爲用曾弗疲往來永驗晝景盡長知宵漏回
去冬苦無雪春夏稀雲雷麥秕禾亦焦颺風乘爲災
連朝反蕭爽涼颺溽蒸開是日行秋令萬族乖傾培

盜賊况未已田疇但荒萊憂生匪余力鹿鹿隨年催
久旱快雨竟日雲雷交滌天木葉飄風乘秋
伏後數日風秋行百物瘁昨夜猶繁星茲雨出不意
土潤適宜時况爲滌炎熾早赧映窗紅俗諺乃足誌
翻盆聲砰洶决渠力犇恣百川會神靈九陌怯塗墍
驕陽歷三時疵疹蒙動植霑灑雖時有滋渥今方被
一洗瘡痍蘇晚收田畝利草竊得銷亡兵災俱偃避
共覩熙穰時重乾子遺淚區區持斯願天心或不棄

秋五咏

五植雜卉迄秋榮瘁不一杜門多暇擇其可
以寄興者五各系四韻時或展諷以醒倦臥
非日觀物有得也

竹

去年儻竹居今年抽新筍脩脩數十竿青翠自相引
對之終日間頗使幽興盡無爲愁西風不隨秋霜實

蕉

芭蕉陰乃滋得雨時已晏夏風息侵凌晚色稍蔥蒨
綠衣彼姝子長袖如舞扇卷舒得其宜終始度相眷

槿

種松材難成種槿花易鮮朝榮暮已落盛衰如眼前
物理固不一脩短同所天汨汨世故中愛憎誰使然

榴

盆榴植數年紅芳一何茂纍纍懸枝實獨耀秋霜後
惜哉阻遐遠不得榮俎豆馨香不常好臨風爲三嗅

蒨

馬蓼本微物移根幽人側剪拂日以長照灼弄顏色
非供耳目玩尚有江湖憶安得返故藁悵悵秋氣逼

秋日寓感

八首

歷歷泣景市匆匆芳歲搖客心久濩落秋氣仍蕭條
在戶有蟋蟀抱葉無鳴蜩斜日明空林商聲隨驚飈
陰陽默嬗代巧智日益雕衰榮轉相伺如彼莫與朝
有形無不盡金石溘焉銷寄言南山松無爲侘後凋

其二

候迫無淹晷秋陰易爲莫閒堂向夕開清燈耿幽素
夜久羣籟息征鴻數聲度感此不成寐彳亍中庭步
仰眠流雲餘菴藹寒月露河漢西南橫衆星爛以錯

已矣何憂虞闊哉此天路
其三一

泄川無停流波波豈相及浮生恣多營念念豈堪執
伊余本虛靜逐物膠所習形神迭成蠱欲械森齧齧
四序不相捨倚伏在歛歛側耳隣家子朝歌莫聞泣
其四
朝入銅龍門長松肅晴昊夕遊玉竦橋枯荷照停潦
宏竇行殿閉女墻半傾倒何來牛馬跡狼藉滿馳道
悼彼經始艱綢繆苦不早玉者雖猶玉土崩胡可保

俛仰思前轍輿替殊草草歎咤何損益沈憂在微抱
其五

巖廊競仁義市賈殉刀錐俱爲有生累云何區高卑
我貴君形者水火無所虧大運驟回合朝菌安得知
其六

珥筆承明廬言動職所殫世更典故佚棄置成枝官
趨蹌塵土中羸馬徒盤跚祿入雖不厚撫躬媿伐檀
爲政戒荒飽詩人譏素餐有懷不得展已復迫歲寒

其七

余本躬耕士早耽田晦樂霜期滌場後百穀亦已獲
歲莫羣役休鷄犬偃林薄隣里時招邀濁酒共斟酌
世事若反掌人境兩零落昔歡百無一長懷負夙諾
武備正未弛誰能念藜藿還瞻故里墟寒莽宿飢雀
其八

秋至寒夜遙幽人起清旦高樹霜始凝顧瞻時物晏
科頭獨隱几嗒焉形神判何用杼退衷遺編幸堪玩
楚國有貞夫懷忠而被竄其意乃摧愴其詞胡衍曼
賚菜盈王庭荃蒞擯荒岸諒無溷泥行安免懷沙歎

豺虎却譖人蛾眉妬華髮突梯膏寵利好修蒙世難
古今諒同軌達士安足惋披讀若有觸沈吟及日盱

初發都門

以下辛卯使閩作

六年束吏舍所向困局迫出郊茲晨始豁若樊籠釋
望山懷故栖遵途惑新陌回首魏闕高塵沙黯將夕
微軀墮世罟拮据事行役豈無四方志悲與親愛隔
曠寂均苦樂浮生安所擇起滅情無端沈思莫能擲
便道過里

匆匆車馬至蓬戶散雀羅開扉掃塵榻陰森氣未和

遺友三五人携酒相經過道昔如失夢問名幸無譌
意色共慙悒慰藉翻滂沱慙其斟酌厚微酣成悲歌
悲歌何所云人少豺虎多
登真定大悲閣于役首茲遊探奇况夙約
昔聞大佛名今登大悲閣于役首茲遊探奇况夙約
投禮意慙悒仰瞻日驚矍逆想結構初神鬼效丹爨
峩峩七丈軀寶鬘雜瓔珞端慈乃天成模冶豈智鑿
諦觀千手眼微妙竟何着愍愍曠劫心羣愚固自若
旁矚磴道幽高躋足力弱三折始造顛豁然入寥廓

雲霞隨呼吸日月可捫摸鱗次迷街衢螳垤擬城郭
山氣蔽趙魏晨光眩恒鄙滹沱帶長流遙聲散歎薄
遠媿翔雲鵠俯羨蟠泥蠖身世跡蒼茫旅見罔依泊
矧者何檀施傳自有唐作草草宋元明閱歷事如昨
卽今喪亂餘棟宇頗摧落願聞無上義大千醒沉瘼
渡河
洪流浩元氣蘊蒸幾千古天地遠莫分蛟鼉細難數
瀕洞望龍門胼胝想神禹欲爲窮源行靈怪或可睹

大梁懷古

渡河三十里，磽嵬沙莽屯。返照翳餘曠，荒城出高原。
云是宋都會，迄明爲雄藩。驅車試周覽，惻惻難具論。
我聞昔全盛，宮觀如綺繁。百年幾翻覆，遺構仍間存。
雕墻賸丹雘，慘淡顏色昏。草阜金明池，崩岸玉津園。
黃巾擾明季，斯邦未易吞。墨守力已竭，歷年絕外援。
盜怒遷於水，洪流入崇垣。貴賤百萬姓，爲魚死何冤。
卽今地形厚，歷歷淤漲痕。寂寞尋吹臺，突兀問葵門。
詎辨審音處，何知俠士魂。天道固如此，已矣復何言。

泊江口風雨

十日滯維揚，再宿淹瓜步。艤櫂大江口，浩蕩生愛懼。
崩沙沸白波，遙山暮黑霧。洶轟雷車奔，瀕洞雨師怒。
烟昏潤州城，黛沐金山樹。魚龍紛騰拏，晦明變指顧。
頗使羈愁忘，欣與奇境遇。所慙當長風，洪流未能泐。

望惠山

弱懷結奇尚，遠遊欣必遂。當境何多乖，投緣似相避。
惠山挺吳壩，一水入遙眊。佳泉耀茶經，夙聞已神醉。
陂陀間高下，林壑布森邃。少斂雨餘雲，微辨烟中寺。
騷騷南風逆，澹澹西日墜。暝色野蒼茫，遽失諸峯翠。

征颿束嚴程愈信簪組累遐期汎秋濤度滌山靈志
胡予袞偕汎西湖

良朋佳山水際之號奇遇尤奇旅役同而盡天涯趣
聯輿出城圍環峯眩初顧舟楫味久諳壺觴煩夙具
澹瀨風不停激泓石可數凜凜清我襟初夏失蒸胸
篙工逆施勇風顛白浪怒雲波恍惚中如有靈怪聚
四山窿碧匝萬頃青鏡布明晦一以殊形譬詎能措
竹覆六一泉鶴去林公墓肅哉干古人胡爲歌酒污
深探乏濟勝非獨豺虎懼杳杳長葑青脚蹶斷橋路

發江山

行役未云已所見日以殊受分有勞逸安能厭馳驅
太末控須江南北實要途邑里一何敝田瘠物色枯
自昔邁喪亂鋒鏑氣未蘇及今歲方僅斗粟易琲珠
悍壯揭竿去穉弱爲流逋羣盜隱巖砦出沒如豺驅
行侶飽凶噤曾無間斯須守土急搜勦滋蔓胡易圖
兼聞虎爲齧白日游通衢磨牙恣吞噬豈直矜負嵎
迢迢四千里艱阻首茲區知命復何憇憫俗翻長吁
遙市轉商舶有里日清湖解鞍試休沐昂首畏景晡

經江郎山次峽口

出郭路漸南目極萬山蔽
陂陁互高下輿行踐田畷
江郎何由名三峯聳雲際
或云慕僊者江氏三昆弟
飛舉道未成化石迷年歲
未遑究誕渺徒能仰幽麗
一峯形敦龐二峯比而銳
林立肩相隨隱見蒼烟衛
行賈必過瞻豐縮卜明翳
又云巔有池雲波汜溶瀾
金鯽多奇鱗碧蓮非塵蒂
可望不可採俗鞅何由稅
僊霞嶺

雨破炎風涼吹我僊霞嶺
途改旅思新力盡崖路永
迴合日易眩盤陡步無整
衣穿白霧濕肌濺懸流冷
低眡飛鳥背仰接奔龍影
挂樹猿狖閒蹲石虎豹猛
天近雲車翻嵐沐烟鬟靚
蒼黑杉百丈葱蒨竹千頃
唯昔此設險巖關隘要境
事去衆志非金湯費藩屏
盜賊尚藜嘯嶮隘尤多梗
世人競捷足及茲未易騁

楓嶺

楓嶺與梨嶺南北相拱揖
石脉固潛通蟠峙各獨立
林木互糾紛亂峯森巖巖
其巔判閩浙風土隔邦邑
躋崖俯絕谷轉道僅微級
凌空危橋滑束礪鳴溜急

負擔盡游估攀緣如蟻集傷哉營微利走險詎夙習
下見稻畦人驚客舉蓑笠馳驚違所性適迴增憂悒

梨嶺

梨嶺日五顯以其神最靈廟貌踞幽麓旌幢幻窈冥
祈請走途旅輸誠卜茅筵厥職在彰瘝豈惟酒食馨
我行暫留憩晦雨曾無停石磴仰逼仄崖谷深蒼青
辭家百晨暮俶詭多所經浩焉窺大化物我俱未寧

舟發浦城

地形下東南灘溜如矢疾客行衝霧雨扁舟僅容膝

粼粼沙痕高齒齒石鋒密礪礪中流鉅細狀非一
狹逼驚濤飛深沸漩渦溢舟楫巧紆避簸盪神先怵
篙工一失手勢爭洪波汨菀蒼崖卉稠奔激岸峯峩
駭奇豫初覽煩促厭縷述乘流怪浮生坎止私願畢

建安道雨

雲晦飛鳥藏行子不得息輿棹渺無定川陸屢回惑
南土苦卑濕夏溽雨蒸塞淫霖迷昏曉險滑困緣陟
長河漲白霧遙山皓同色祗疑天潢傾神龍怒叵測
飛沫濡須髻顛躓步匍匐徒裝沒新潦芒屨委塗殖

微躬匪金石而爲陰陽蝕已往慙知非迷復將何極
鐵嶺
歷嶺什伯數茲山名獨著縣巨界鐔汀敦龐勢堪據
蒼涼萬喬木淅淅野風助衆葉一以秋燠促獲偃豫
四眺天貺改雲石互騫翥森然靈怪窟誰能指其處
巖若賸伏莽扞衛累徒御畏途不可留惴惴驅車去
往復過將樂以不得遊玉華洞爲恨

伊余滯京師每作雲林想薄秩苦維繫不得遂長往
及茲遠行役萬里環輪鞅雖倦馳驅勞謂伸夙昔仰
鏞州富岳窟玉華號幽廣宵冥鍾瑰異蒸潛幻物象
昔過嚴程迫今歸淫潦長逢人詢髣髴驚喑徒憊惘
神境隔塵俗劣賦慳靈賞乃徵造物緣離合莫能強

黯澹灘

豁灘奇多名黯澹不可觸我來值水殺洪流尚奔續
巉巉萬石齒妒布無遺矚直下磯勢阻逆陟峽形矗
當其汜濫時拍天激浪酷行子推畏途咫尺隣魚腹
岌岌牽一筴旣劇垂堂蹙長年氣整暇漿柁理詳熟
仰涉凌飛濤石罅妙紆曲進止有餘裕操持快心目

因知濟險者所負必素足庸夫喜大言遇變手恒束
浦城旅舍早秋效長慶體

娟娟池面荷澹澹荷下水寂寂虛廊靜獵獵微風起
魚影近依依竹光青靡靡森爽涼肌骨徘徊閒杖履
新秋迎可親殘暑去如委勿爲羈旅嗒幽居胡得此

釣臺

峽闢駛清江林秋烟漠漠歸樵愜沿流晡發富曹郭
曉及巖公灘宿雨生朝寒濃霧蔽不盡雙臺出巒岈
停榜暫維繫杖策躡石級孤徑人踪微草露濡衣濕

澗藻綠堪把再拜公祠下漉漫何年碑尚記持竿者
昂首磴道危引臂蒼蘿垂三休猶未極發興能忘疲
盤迥過木杪松栝隱遐眺淅淅羣籟吹絕壑開森窈
天成峙左右石亭亦相偶一瞰碧茫茫先生竟何有
試覓垂綸處竚延不能去蕭然榛莽間沈沈增慨慮
嗚嗚交道凌意氣多驕矜世無劉文叔焉辨嚴子陵

金山

徧歷山行艱見山不敢厭孳孳嗜奇志時苦力不贍
覲面多所失事後徒縈念以斯自懲艾決策期莫玷

茲山當舟達終古峙奇豔壯遊夢寐中披圖未能驗
孤根輔地軸傑構蹴天塹招提隱雄麗神怪此壇坫
日受洪波攻箴竇開灑激石林蕩紫翠雲波互烘染
我愛浮圖高一豁天顏揆諸峯戴亭榭瑣屑氣盡斂
朝探及畢景恣留遂忘饜飜縷將有述何以使無歉
偶爲乘風行清曉帆力足輕陰遲晨光烟姿澹相屬
扣柂溯邗流去鳥翼同速指顧度孟城一葉入激綠
平湖始何代龐爲衆壑腹空明勢無極一細紋蹙

雨色東南來波靄共犇逐遠近水態更葑蓼靚膏沐
茅茨瀕湖氓婦子臥溝瀆媿余力匪及徒取媚旅矚

黃河舟行

數日雲物善九月亦未寒空明大河水南風吹驚瀾
川圻邈紆負天地茫無端洪流委身命瓌詭愜大觀
遙思下積石濫觴初瀾漫偉矣參四瀆終古神獨完
濁浪勞晝夜利涉人力殫飛檝距奔溜探標試洄灘
快余乘長風危檣無所難蕭灑林外邨鞞鞞耳底湍
高秋氣森爽草木淨岡巒夕照頽中流動盪赤玉盤

誰云茲艱虞披眺得清歡忠信敢自矜履險實所安
歸述 二首

昔去西城西今歸北郭北往復此故吾風塵改顏色
長安名祿區巧僞日滋殖熙熙爲利來馳走幾時息
朱門非舊主窮巷多新識世變若流水東逝安所極
其二
昊天闢嘉運羣龍翼休期薄才事奔走如彼蟻旋規
伏觀古王治綱舉目畢施管伯氏者佐亦云張四維
宣室倘有問芻蕘敢言私

夏夜對月柬胡子哀

壬辰

永晝漸難夕炎氛幸未盈四體遂休暇蕭然此閒庭
月出東南天鑒人有餘清的爍移屋角空闊滿前楹
河漢沒無見衆曜失光晶高林葉茂密嘶嘶楠鳥驚
翻如深秋夜羣吹成淒聲乃知悲喜端外物撓其情
舉似誰足語浩歌念爰生

建蘭數本携來自閩南北失宜半就枯瘁夏霖
滋殖雜草實繁幽靜之姿遂見揜沒傷嘉卉
之不勝惡植也爰爲賦詩

憶汎建溪舟閩土多芳草幽蘭軼羣類芬香昔所寶
提携逾霞嶺遠來萬里道屈爲牖下娛慰我丘中抱
何期生意盡莖蒂日就稿或有殊鄉悲炎朔候顛倒
乃知絕俗姿違性難爲好今夏雨不休庭際成潢潦
衆草滋爾藁蘭也蔽莫攷蓊蒼蒼方怒生紛披勢堪惱
嗟乎陰陽權詎惟凶是保雨露無岐施美惡迷大造
安此非一朝搔首仰長昊

贈別

二首

莽莽京落塵端居淹歲暮何來剝啄客投我以尺素
駕言思故山拂衣卽長路高唱河梁詞三歎爲我顧
欽子淮海俊中懷璠與璐惜此清廟珍烟霞豈能錮
大運方亨衢羣龍正翔步胡不影華纓裊裊策高足
握手永今夕白駒幸可駐勉矣崇令儀庶用慰愁慕

其二

離驂嚴晨駕之子不可留采采文無贈微言默相訓
何以展衷欵清滄霑君裘明月爲君佩杜蘅爲君羞
懔况六合間聚散如浮漚自匪連理枝乖絕當何尤
東南渺雲外山川阻以修勿輕斗酒會臨觴暫綢繆

北風吹五兩孤棹沿寒流
瑤草芳未歇歸與偃佺謀
雪

夜漏凍無聲虛窗闇生白
曉看枯樹垂飢鳥啼喑喑
低雲無異姿廣宇皓同跡
澹曠激幽襟凝互絕來屐
三白兆歲豐臘雪等珠璧
陰陽銷慙厲東作富菽麥
皇天意良厚曾無吝膏澤
吾廬雖敝陋忍寒詎足惜

苦雨 癸巳

逾月雨無間
沆雲駢不開
朱火失其柄
陰沴乘爲裁
慄戾長風鳴
鞞鞞中宵雷
黑蟻肆跳踉
神龍怒喧阗

力挽天河傾萬弩
不可迴昏曉
一瞬昧霑濡
靡吟咳
百川隄障盡
三辰晶彩頽
几席羃碧蘚
篋笥黦蒸黴
虬螭緣衣桁
鼃黽游庭陔
敝室更苦漏
垣宇半崩摧
曳尾本泥滓
藏身唯蒿萊
固窮聊自矢
已溺徒興哀

送宋玉叔之秦州

駿馬鐵連錢
鬣掣黃金轡
借問行者誰
持節神仙吏
子本金閨彥
青雲早自致
論交盡天下
蘭雪照明義
泱泱表東海
卓樹辭壇幟
掄疑訂今古
風雅資鼓吹
余也識君晚
半面心已醉
平屐踈經過
欲別始煩恚

側聞天廟需首重瑚璉器胡爲去遐陬不及陶匏類
泔蕩雲衢高翔遊必孔翠環瀛恣所如刷羽非垂翅
天子稱曰能巖疆惟爾試一路蘇民疲五涼控地
利是時北風勁燕臺草木瘁握手青門旁含語不得
遂巒嶂擁關山西望雲沙積羌兒竹馬歌隴管梅花
淚爲尋東柯好並探仇池遂應續杜陵詩晨風待遙
寄

藉田恭紀

甲午

順治十一年仲春肇舉耕藉之禮屬叨侍從

獲睹 盛典爰賦詩十章俾夫擊壤者謳焉

昊天擇厥子惟德不以親聖人執大象奠物非佚身
禋享有常秩幽以悅百神阜求不敢私明以媚兆人
人神苟無憾黃虞道彌淳

其二

板板降疾威嶽瀆蘊瘡痂金革蝕元化動植失其理
乃睠授大命謂真人東方起一戎消欃槍四征翦封
豕端展坐明堂來庭仰恭已

其三

維 皇凜邦本盱食懷春冰云胡堯湯運水旱妨年
登牲玉徧羣祀墜典靡不興覲土咨陽官 朕命汝

克承司事以時戒農祥晨可徵

其四

中春吉維望祀事歲且虔除壇簡農用瞽告協風先
淳濯致精意祇祓德逾蠲閭闔傲宵漏庭燎光燭天
鸞旂聲噦噦戾止於壇前

其五

維時夜向晨卿雲爛初霽郊壇駐璫燾帳殿留玉軌

奠虞備和聲羽旄敝儻綴裸鬯手殷薦馨香神所嘑
盼蠻烟燼中遙見揖羣帝

其六

倬彼田千畷后稷監所薺震淪爰有待陽瘳蒸土膏
葱糝旣閑則覃耜乃躬操一撥示無耦三推肯云勞
畢事 聖顏豫日華浮赭袍

其七

公卿何濟蹙方剛間黃髮班三循乃職恪恭孰敢忽
終畝維庶人備墾力搨搨保介播及時百種覆新垆

億秭鍾神倉我粢潔以醇

其八

式禮敬終事

帝用釐爾成來賀四方至齋宮儼嚴

清田峻率厥屬襍禛雜簪纓膳夫羞玉食班嘗羅廣
庭誰謂田野人亦解簫韶聲

其九

天意如有畲醲和變春寒激旭風不運重輪耀雲端
一時轉僊仗萬姓瞻迴鑿侍臣騎如水劍佩鳴珊珊
千載曠斯遇帝力歌同歡

其十

無逸唯聖謨太康古所戒居高聽則卑葑屋後時邁
華陽馬欲歸渤海刀須賣菽粟如水火方隅飢始瘥
更有監門圖愚臣贊颺拜

月下弄簫

雲盡秋空高素月停規影廣除如積水浸人肌骨冷
紫簫閒數弄其聲澹而永驚鴻鳴相和白露霑衣領
吹出太古曲舉世無人省余意在滄浪安得汎舴艋
有事太學宿御書樓下感述

索處忘歲陰境異結遐想
來人跡外寂歷得心賞
入門肅高矚形神迭幽爽
循覽多陳蹟太息深一往
老槐四五株天風墜秋響
墮陽漏東壁宿蘚連階磔
須臾晚色來城闕黯蒼茫
衆籟雜然作客意悽愀
惘緬思昔建國規模何宏廣
四維密以張教化尤敦獎
成均作人府經史資漑養
鏤板布四方度置危樓上
治平有根據邪說莫能蕩
磐石數百年厥報實默享
遺構猶幸存經始憶疇曩
丹雘剝高甍蠟燭欹銀榜
斷垣失障蔽空庭塞榛莽
細民溷清閫楨鐻無人掌

藜火銷太乙夜氣窺魍魎
羽陵簡易蝨汲豕逸難網
墻壁隱詩書章甫淪兵仗
卽今絃誦徒不費公家帑
揅時見迂闊懷古足俛仰
片月寒近人夢遊尚惚恍

魏石生有選詩之舉賦贈

此道久淪亡風雅危如綫
持論乏平心茹吐遂交戰
循墻固可非吹鑿未云善
中立亭調停復爲五色眩
在昔七子儔才具各雄擅
聲華壯疲茶意匠開精鍊
後起竊形似畫肉狗雕絢
廣睂非作俑半額累婉孌
竟陵承其敝矯偏亦有見
居然拔趙幟風會隨犇轉

警之於山水巖洞與陂淀幽奇足供賞河嶽一朝賤
其流成細嚮字句徒割割瑣瑣及閨匳蟲魚雜蕭菽
大雅詎得然二君不受譴當今多人豪眼中數難徧
孺子罵曹劉優孟爭壇墀靈蛇家自珍四方馳軸卷
嚙啗牛耳歸抵掌雌黃煽毫素寓籓籬索價同估術
魏子有憂之曰斯責余嬗折衷砭沉痾力虎目光電
深心避其名孤高寄搜選有如弊羣吏良窳待最殿
凡例粲刑章繩尺黜異撰標新尊性情揆古嚴正變
要領在無我剛大絕愛戀坐令元聲復手抉淫哇罨

強者不敢忌弱者不敢羨豈惟娛耳目隆污相後先
疑信世人情余言以爲弁

初度感述七章

少丁多難壯而無聞閱世

未深復出寤語將以供不知我者詎病焉

燭龍無夢時夸父徒高步誰熾洪爐薪炊此花上露
我生閱茲辰屈指三十度齒髮雖未衰精力漸非故
用世與學道差池成兩誤妄意希古人知非已遲暮

其二

我母生我時未晬病不起祐薄甌乃雙七歲成孤子

旁復無兄弟食貧祇寡姊二十餘年來臨餐不知旨
不謂有今日兩間偷眎履所媿析薪遺獨抱餅壘吐
力短苦道長沉憂莫能豸

其三

我里高河東

高河古水邑在
其北以此得名

實維顓帝墟村氓數百

家俗類古陳朱承平孳姓族鷄犬恒晏如萑蒲一朝
起殺聲闕矜鋤茅茨照烽燧平原血成渠孤嫠走四
方貫魂刀俎餘羸老什存一轉徙無安居况復頻水
旱新田無人畚盛衰有主者私念徒區區

其四

貴賤共茲日時改年亦侵一爲居養移悲歡遂異心
吾觀貴人門車馬何駸駸磬折便媚子稱觴介千金
下箸匱海陸俳優進奇音長夜不知亂茗芋酒重斟
但恨天易曉絲竹聲銷沉

其五

亦勿歎積薪亦勿羨累棊薪居上先然棊增高愈危
壯士傲白刃慊夫迫朝飢貧賤俗所耻富貴禍所縻
貧不貧之間終老復奚辭

其六

天畀有定分黠鬼瞰高明拙哉主父偃鼎食換鼎烹
大患吾有身百年煎七情有涯隨無涯此願何時盈
所以高蹈士空谷葆幽貞世人不解意浪謂學長生
拮据事爐火丹砂卒無成

其七

荏苒歲忽陽凝陰氣已冽同雲埋朝暎北風舞初雪
集霰霑庭柯寒響何騷屑斗室幸未冰含毫效一映
緼袍足禦冬蒙茸望敢缺造物力深厚貞元用更迭

安知嚴殺際生意中蘊閉吾道不終否爲齒勿爲舌

送王念石之符離

君歸自衡嶽應上岫巖峰爲尋禹碑字茫茫野雲封
揚帆返京國轉蓬等行踪金閨舊夢渺丹轂新恩濃
遇合非所艱天闕足知己君豈簿書才相屈偶然耳
符離控楚宋其地古戰場分猷綏一路玉節何焜煌
與君同學時豪氣人辟易謔浪橫古今孑立壁千尺
昨來共君語意興不如昔將無聚散情賢者亦未釋
君行當嚴冬燕郊草枯白握手欲無言風吹馬毛磔

政成早歸來宣室待前席

非來其味斯意與不味昔微燕梁游前賢香衣未歸

與休回學報漢京人報及翁賦詩古今不立坐干只

林燕斜發宋共賦古輝感不歸西一龍玉前所賦然

豈合非商賈天淵只我出豈豈讀書太休風跡然耳

歸洲並京因轉藝等計和金丹書夢妙丹輝薛恩歸

或謂自香塔靈王帥製和成靈禹聖字我著從雲樓

去王念孫之符編有本意者不為其言也

或賦靈迹到本意中微則詩賦不為否然尚以靈言

心遠堂詩集卷之二

高陽李蔚臺書著

男其凝校

五言古 二

積雨彌旬索居多暇即景述情成詩七章

丙申

夏閏暑氣微積雨况未歇蕭然庭戶幽曾弗異林樾

雜花遶堦生次第清香發尚友北窗人羲皇此津筏

其二

竊祿聊代耕性復畏煩劇珥筆幸多閒素餐免譙責

玉堂集時髦自愧他山石奇字困應酬談經昧幽蹟
冒雨且歸來下惟有餘適

時余方教習度常

其三

薄劣寡交遊塊處耽閉戶晴明無客來况復阻陰雨
青含砌竹肥紅濕盆榴吐蝸跡篆虛窗苔痕繡閒廡
靜觀欲忘言物理斯可覩

其四

世味無所解結嗜唯簡編寂寞以終日開卷卽欣然
古人不我欺搯縵方安絃欲求作者意力弱愁攻堅

往復難自釋拋書成高眠勿令學徒知恐嘲邊孝先

其五

夢覺檐響靜晨光乍熹微青天漸解駁沉雲亦歸飛
所職在鉛槧期會不可違歸途望西山晴翠侵人衣
巖穴知匪遠深慙矯語非

其六

片月出東南雨後光愈皎微雲似相避素影翔天表
大火漸欲中湛湛銀河渺鳴蛙喧草根流螢墮樹杪
晏坐遂夜深息心謝膠擾安閒稱踈愚所得已不少

其七

陽鳥三日輝豁爾沈憂釋密雲自何來飛雨忽當夕
淙淙竟達旦聲若萬弩射茅屋頗穿漏欲睡不安席
四壁盡楮柱跼蹙畏崩圻曉起看空庭浸堦水三尺
吾廬不足憂但恐失禾麥惕厲天語勤蔬食虔牲璧
有司無告勞仁愛自昭格

九日

代謝有常候荏苒迫歲陰靜者觀物化勞人苦時侵
重九名可愛令節傳古今奈何牽世網馳騫違寸心

驅車歷長陌濃霧翳高岑飛沙送驚颺商吹鳴空林
歸來掃塵榻落葉盈堦深叢菊如自媚繁花散黃金
貞脆固殊性澹焉同幽襟分無白衣至濁酒聊獨斟

南苑扈從雜詩

五首
丁酉

南苑三扈

蹕西宮再逢夏茲來新雨餘物色澹清

灑朱火伏未盈雲峯鬱堪寫萬幕繞宮墻櫛比如里
社朋儔各相呼過從歡非寡斲此釋煩襟有獲欣謀

野

余以乙未正月初至南苑扈
從丙申五月再至及今而三

其二

散步乘晚涼西眺見羣峯返照射雲隙澗瀆紫翠重
雨洗原野淨草木爭丰茸往往牧馬還時與歸禽逢
喧寂一異境曠翳遂殊胸乃知造物奇特爲勞人供
晚步

其三

新蟬何處聞菴彼周垣柳朱明綠暗時雨歇風輕後
悠颺驚客枕斷續穿宮牖簪筆幸餘閒天籟聆非偶
崢嶸日月逝俛仰初心負樹蔭一編書臥聽憶南畝

聞蟬

其四

去年西苑舟今年南苑雨宸遊殊動靜扈從仍重五
無因酬令節靈霖坐相苦几席費隄防帷帟煩撐拄
濕雲低近人行潦深窺戶晤言賴友生未覺蒲觴寔
半醉獨篝燈天外聞簫鼓

五日同予袞苦雨

其五

野處當盛夏苦雨固其恒驚颺胡爲來中夜肆馮陵
震電怒不息雨雹紛相乘衆竅助呼號二儀疑隕崩
吾廬力不支勢欲隨漂騰捍禦雜僮僕昏仆疲股肱

有如一葉舟，颺母中流與。又如萬鐵騎，摩戛鳴戈矜。
微軀委大化，屏息良不勝。逾時乃衰止，安全豈人能。
擁衾坐申旦，不覩朝日升。復聞翠華出新雨，閱田
塍。夜大風雨。

題曾霽雲先生遺像

癸丑同館閣，公先子所嚴。長離起閩嶠，振羽光炎炎。
三禮帝咨伯，醇風再被漸。用之乃不盡，慳公以梅鹽。
閱載四十奇，覩公於斯縑。典刑森須麋，精英浮紳紳。
不殊從公遊，負劍承視瞻。頃篋緬隔代，霜露涕重沾。

圭璋欽喆嗣，世業傳縹緲。拜手囑珍弄，麟圖並無燿。

南苑卽事用韻 戊戌

歲晏庶務和，豫遊動仙蹕。從邁有常期，侍臣咸橐
筆。行宮丹雘新，環衛周廬密。老樹振凝霜，遙山澹寒
日。鏡吹時復聞，千騎霓旌出。蒐田寓詰戎，馳驅契無
逸。封事幸餘閒，素餐責易畢。高言許追陪，蹇劣濫清
秩。步武得儀刑，警欬依殼率。矢爲麻中蓬，薰陶變微

質

時菊潭逋空
諸先生偕行

贈外舅朱公

伯陽觀妙徼園吏遊逍遙副墨幾千年解人乃寥寥
夔虵謬相憐鶉鷄終自超外身捐物絃見者使意消
達生偉我翁脫屣追松喬鞭後真有得帶適久忘腰
曾見海底塵不覆隍中蕉翔鶴摩雲漢鼠璞豈爲邀
願翁堅此意坐待神山招歌嘏且勿厭春酒浮詩瓢
賦得元日到人日巳亥

寢牖警高青溫暾破凝霧晏起振敝裘始覺得春趣
回思六日來窮陰騁嚴沍曦輪柅無跡物色慘昏瘖
歲朝驚鬱攸震灼西隣屬吾廬幸安全椒盤委狼顧

元旦隣家遺
火余居僅免

濃冱繼昕夕木介三四度如霰復疑霜
芒萁紛布濩兩爲南苑行馬蹄踐積素列幕迷炊烟
長阡森玉樹歸來檢占書頗爲首種懼二氣或僭差
無乃煩呼籲何期天心轉茲辰賜和煦匡坐有餘閒
剝啄不及戶市塵人語嘈漸理嬉遊具一懶謝流年
人生且隨遇

穀日卽事

已喜人日晴八穀復陰晦北闕匿晨熹西山失遙騰
輕飈痒肌骨短簷垂霑霽春服未可裁年華罷雕績

入夜雪微作六出競姿態稍看凝階除皓潔媚盼睽
吹萬靜寒宵遠柝傳闐闐或謂兆有年三白仍需再
但使歲功成敢惜燈遊礙襪祥余何知手牟聊相對
曉霧下直用韻

朝霧增春寒曦輪不得騁冰花結須眉長衢迷素影
羣動各有營車馬喧塵境襪被早歸來齋心慙內省
徒羨考槃人幽居遂恬靜

送葉玉倫令容縣

葉子吳士雋醇質抱美才三仕仍墨綬世路何遑迴

通籍令燕南登眺天風臺浮雲雖善蔽旋覩陽光開
秦關再捧檄巖邑邵水隈政成未及報讀禮復歸來
麾手謝榮膺食貧忘怨咲重念學古力未甘壯心灰
茲行得容江遠隔西南垓蒼梧控百粵聞見多奇孩
風氣異中土夏瘴兼冬雷五嶺困輿馬高灘苦泐洄
遊蠱光燄毒跼鳶毛羽摧蠻徭烏獸性難以禮義裁
况當兵火後閭井鞠草萊伏莽猶未靖殊俗蓄驚猜
子荷芻牧任教養職所該幸無鄙其民治術奮規恢
化導宣德意噢咻勤招徠務俾安耕鑿無令陷罝罟

漸被以文物絃歌雜笙箏賦遐徼快一變挺拔見吏材
公論在婦孺何用愁無媒把袂贈言罷春風吹離杯
行矣勿戚戚丈夫豈徒哉

閒居雜興

九首

茅宇新結構荒徑時埽除非園亦非墅聊稱幽人居
繞階羅卉木滿架陳圖書雖異巖穴趣自適頗有餘
平生無密友非緣索處踈

其二

當關無剝啄幽興催早起科頭閱動植小庭閒步履

秋深氣轉和風日快晴美晨光漏林樾鳴禽聲入耳
倦行臨砌坐把卷清陰裏反覆古人言會心時啟齒
行休念吾生所得已云侈

其三

時序近重九所喜連日晴心閒四肢逸偃曝就南榮
顧見籬下菊鞞鞞黃金英孤妍不悅衆晚收移我情
寄謝成蹊者無訝異生平

其四

喜晴方未已驚飈忽繼之寥寥衡宇靜撼撼高樹吹

黃花舞顛倒落葉鳴聲悲太息人事異不定如天時
物我委大運安用分榮衰

其五

翩翩簷際雀啁啾似相語茅茨朝日溫歡然命儔侶
但能遠羅弋不願豐禾黍微物智於人一生需幾許

其六

遲遲蓬門啟冉冉寒日上清霜漬庭蕪冰漸結魚盎
吾觀代謝理流形遞衰王二氣以默移妍醜遂殊狀
金石延微軀所希無乃妄

其七

落木延暝色雲盡天宇澄庭際如積水素月和霜凝
箕斗自高懸實用誰見微嗒焉壯心折商歌徒撫膺

其八

達人感世短烈士悲時邁我獨頑以鄙此中無芥蒂
羊祜難親踈徐邈渾通介古人獲我心執鞭以爲快
世味如鼎臠染指當一噉防噎在屬厭老饕有明誠

其九

自余罷朝謁奄忽逾十旬心已逃空虛跡尚異隱淪

畏客原僻性况復寡交親
跼然不及戶偃仰恣天真
百年諒有以萬慮倏已陳
息黥補吾劓敢負造物仁

扈獵發南苑

巳亥仲冬

講事耀皇威時巡首畿甸
選徒盡貔虎從邁合纓
弁維時日長至雲物美清晏
上林啟西墉僊仗移行
殿六飛御弧矢七萃嚴組練
招搖旌曳霓騰達騎流
電鏡鼓士氣作鵝鸛軍容變
林莽弔周陟岡原快登
踐夏服爭一發湯網祝三面
黃耳振重鎗蒼鬪脫鞞
纏兔犇窟穴迷雉隕毛血
濺旋抽勇堪鼓超忽目易

眩如陵獲競多命處技各擅
大庖無取盈乾豆詎勝
薦側窺廟謨遠因事慎規填
馳驅示無逸惕厲在
忘戰肅殺順時令休助咨寓
縣不然好生德從禽寧
所戀儒生履戎行盛事但驚
羨愧無穿札力跼蹙傍
鞅馱

附集選送子明歸金陵

四首 辛丑

暮收清西陸

郭景純

秋風發微涼

曹子建

庭草萋以綠

張景

陽白露爲朝霜

左太冲

紆鬱遊子情

陸士衡

願言旋舊鄉

潘安仁

徘徊不能去

王仲宣

携手上河梁

李少卿

何以敘離

思潘安興言在臨觴陸士臨觴歡不足陸士相去悠

且長蘇子

其二

流波戀舊浦張景客鳥思故林王正離合非有常陸

衡悼別豈獨今同上所思在遠道古詩曠望極高深

謝朓久要不可忘曹子布懷存所欽謝宣晤言用自

寫阮嗣丘中有鳴琴左太

其三

金陵帝王州謝朓故國多喬木顏延出宿薄京畿謝

運稅駕從所欲陸士綢繆踰歲年江文怒焉傷別促

衡陸士良儔不獲諧盧子徒作千里曲謝靈在遠分日

親曹子寸心於此足沈休仰視浮雲翔蘇子天高萬

物肅張景

其四

悠悠涉長道古詩迢迢匿音徽陸士川陸殊途軌同

上引領遙相踰古詩涼風厲秋節王仲婁婁陽卉腓

謝靈停艫望極浦江文林表吳岫微謝朓養真衡茅

下陶淵樂道以忘飢傅長努力崇明德李少桑梓有

心遠堂詩集 卷二 十一 五言古

餘暉

王仲宣

匪親孰為寄

丘希範

知音世所希

陸士龍

願為

雙黃鵠

蘇子卿

奮翅起高飛

古詩

贈陳若水兼送之建南

王寅

北風吹枯莽霜花照征袍相送不能別慷慨捫瑤刀
論交二十年如彼水乳遭蘭雪蕪肝肺明義層雲高
重逢益靜穆晤語解天殺揚扈盡今古雞壇振風騷
浮白佐吳歛朱絃賞雅操申旦不知疲金缸竭焚膏
所志存古歡匪徒文酒豪良會未云足俄看理旌旄
將離欲為贈使我心鬱陶羨君抱大器經營四方勞

有時薦清廟鈞天奏雲璈建南予所歷溪山美遊遨
况今鯨鯢伏環海靖波濤政成早歸來為君儲清醪

成文穆公素園圖為青壇少傅題

癸卯

淳澆日更迭慨焉慕往古前哲不可作遺跡亦欣覩
偉矣文穆公相業炳冊府抽簪燭幾先綠野開林莽
結構倚天然亭臺屏妍斌天喬各適性禽魚歡得主
公日遊其中烟霞恣携取老友定有人飛觴復揮塵
卽今三紀餘高蹤歷堪譜少傅起興朝尹陟看接
武創番邈手澤不朽記毫楮茲圖得其槩披玩神軒

舞編惟先君子中年謝圭組菟裘營未成騎箕銀漢
澣敝廬數椽在不足蔽風雨深余堂構慙撫卷中心
無

癸卯除夕偶讀東坡集有龍鍾三十九勞生已
強半之句余年適與之符因次其韻成長句
一章感舊述懷見乎詞矣

擾擾百年中苦樂適相半墮地逐塵緣一往成慨歎
世事如雲烟過眼難久玩仕宦有升沈親友多聚散
嗟余三十九孤生無與伴閱歷盡陳迹逆數等宵旦

弱冠竊升斗珥筆侍香案匡時愧籌策鏡古迷治亂
年來益踈慵思以道自盟綆短汲苦深流光不肯緩
四十倏相侵無聞仍舊貫未知伯玉非甘守之奇悞
今夕復何夕火映松盆炭躍躍兒女懷點綴喧庭館
明日把屠蘇後飲須重暖濡毫和遺編清言慙綺粲
元旦次日大雪復次除夕韻 甲辰

歲朝雲物和微風興夜半聞巷鷄犬寧比屋無咨歎
侵晨訝寒威曉色未許玩同雲幕庭宇天蘄滿空散
初疑柳絮輕似作梅花伴霏霏過亭午冽冽如清日

孤吟乏同賞空樽臥塵案亦免剝啄來踐踏瑯瑤亂
節假追朝謁晏起徐櫛盥安坐調素琴心閒手恒緩
倚絃歌白雪歷落驪珠貫謝彼豪華子飛觴論猛愞
錦幄炙笙簧金爐然獸炭慙予享清供蕭寂幽人館
行看大有年耒耜需春暖南畝掃遺蝗家家歡授粢
題劉孝子割股卷 新安人名子信母病割股以
進遂愈詳見高似斗司寇敘
忠有虹貫日勇有石飲羽至孝格神明霜刃試無苦
膚剝心則愉父悲母已瘡色笑等尋常沾沾耻揚詡
大哉百行先頽風挽淳古吾知渥城傍畏壘巍然覩

雜述 乙巳

自夏徂秋退食多暇觸懷成句得詩廿二首
語無詮次故以雜命焉

三春苦恒風驕陽夏復半祝融秉炎火大地歸爐鍛
赤鳥翔中天永日不肯盱沙礫迷街衢蠅蝻擾几案
織絺劇重鎧坐起漿成汗襜褕時見呵剝啄幸已斷
西北無麥禾東南滯白粲素餐何以解疾首誦雲漢

其二

向夕雲色好油然欲爲霖飄風從西來席捲歸遙岑

碧天淨如掃餘涼爽衣襟苦熱何足言所憂在歲侵
吾欲愬風伯天門高且深

其三

入夜不能寐羽扇無停揮仰眎天宇闊象緯何離離
鶉火位方中河漢將西移念彼代謝理吾生豈無涯
嚶嚶飛蟲鳴熠熠流螢輝物我隨大化堅脆諒同歸

其四

道逢祈雨者徒侶何皇皇金鼓震通衢旌旛競飄颻
土木象神龍鱗甲飾丹黃父老爭奔馳婦孺亦趨蹌

小人雖身謀憂勤助巖廊有司委釋老結壇薦馨香
精誠苟可達寧在盛儀章我聞大雩禮歲舉有典常
春秋書非時憂民貴豫防爲犧抑已甚遐哉古成湯

其五

朝來暑氣添時令入初伏有滄萋以興俄看飄霖霖
未能被壟畝差可解炎溽中夜乃滂沱膏澤漸霑足
喜極不成眠起坐聽簷瀑竚見焦暵蘇同人歌鼓腹

其六

冉冉畏景暮皎皎素魄盈炎靄散林表清輝滿前庭

何以陶永夕開軒命友生圍碁觀坐隱朱絃發希聲
鮭菜隨意陳壺觴聊共傾或述田野樂或言山水情
笑語見天趣無復俗念縈何如市朝客尊杳談利名
其七

圃中有隙地可以營茅齋匪日事遊佚聊用寄野懷
因凹以爲池就凸以爲堦棟宇取樸陋簡易省安排
綠畝被瓜蔬傍簷蔭榆槐有同蔣生徑期與求羊偕
遠廬豈不悟委順無睽乖不見古至人嚙焉遺形骸

其八

雨後曉行園蔥蒨色如染霑濡土膏發可以施鋤耜
夏畦人力勻秋蔬種方掩早茁茁茸後坼甲點點
迴風舞天喬零露滋荏苒禦冬庶可期青蓄計無歉
歸田興聊寄拔葵誠誠忝何當借老農長往事耕斂

其九

今朝已秋令涼雲送殘暑微雨集庭柯綠葉隨風舉
絺綌漸不親齊紈意如旅却思歊蒸時將謂永淪胥
寧知大運更迴斡速如許世人胡昧茲炎炎欲久處

其十

翟公悟盈虛老氏垂止足陳力周任言婚嫁向平躅
嗟余本慳夫徇世營口腹吹竽倖濫售弱冠叨食祿
侵尋二十年生耳見車轂裨補乏毫毛鼎寶羞公餽
避賢有前轍斯意亦久蓄况復雕朽材埤遺負鈞軸
所恨機未諧撫躬實維谷欲就良友謀引領待忠告

其十一

龍門有孤桐其音中宮商斲爲綠綺琴得升君子堂
徽以昆吾金軫以玉截肪組以朱絲絃盛以縹錦囊
援之奏何曲廣陵與明光徒有古器存惜哉古調亡

涓曠不可作舉世沸絲簧

其十二

鳴蟬本微物胚胎自泥塗炎風假之便憑高任喧呼
喋喋如有訴纖羽颺輕軀使我夢魂擾不得遊華胥
爾時能幾何秋霜被庭梧繁聲會銷沉終作抱葉枯
詩人刺蝮蟪宣父吟螽蛄厭靜而尚囂無乃非良圖

其十三

何以寫我憂駕言出南郭窈窕誰家墅芳塘蕝林薄
石徑深透迤亭館布參錯芙蓉爛錦綺飛梁跨水閣

規模殊壯麗金碧已剝落賴有遊人來時時慰蕭索
借問矧者誰當年氣熏灼傳舍閱多人百歲如今昨
感此意豁然萬事付杯酌爲語同遊客慎勿緩行樂

其十四

秋暑鬱未收淫霖助烝濕昨晴今復陰已聽簷溜集
苦旱憂方終苦潦行復及嗟爾田疇人入口何由給

其十五

吾聞有漏天南恒北方少茲雨胡纏綿一注連昏曉
沈沈雲影晦汨汨簷聲擾几席濺飛流堂坳滙池沼

蝸牛上衣桁菌耳生細縹九衢漲昏墊跬步陷泥潦
疑决天潢傾翻愁砥柱倒春夏苦曠乾入秋嗟浩漾
陰陽一乖蹇萬物困濕燥感召誰能明仰首視蒼昊

其十六

月彩瑩如珪露華涼似水披霧睹青天萬象皆欣喜
獨有無絃翁片念何曾起

其十七

在昔有至人號爲列僊儒陰陽稟間氣變化超寰區
首能絕嗜欲自甘山澤癯精華盜天地偷生尚多虞

奈何末俗士妄念起貪愚志耽世味醜矯語慕冲虛
軒冕成內熱粉黛攻殘軀無聊自解免浪異延斯須
况彼方技士其言誕且迂娥媠以爲鼎鉛汞以爲爐
熊經與鳥伸百病可蠲除以彼誨淫說中此多欲徒
沒世竟不悟誰能鑒前車

其十八

曲士自爲廉醜女自爲貞隻手掩衆目盜取後世名
東陵悲死利西山笑遺榮室怒而市色方寸深府城
去去非吾徒相逢蓋莫傾

其十九

積雨再經旬蒸生苦淋翳何期今日晴復觀三光麗
秋山翠峯堯秋水澹溶瀾高深故依然陽晶散陰沍
浮雲擅天威乃與飄風逝寄語杞憂人淫霖有時霽

其二十

彼美荆山璞玉人琢爲珩淳質謝華飾虛中示持盈
流傳彌歲年頗遭世眼輕故人持贈我意重十五城
古色照心顏比德欽幽貞願言薦清讌庶以表君誠

其二十一

有客升我堂衣裝浣泥滓未語先蹙額太息不能止
爲言今年災畿輔縣千里吾鄉尤顛連先旱後苦水
三春滴雨無高田麥枯死污邪雖半獲所得皆稔秕
不足完官租矧能沾箸七六月雨稍濡晚禾頗蕤蕤
引領望有秋俯仰命相倚七月雨大作禾頭盡生耳
經旬猶未休廬舍俱傾圯平原漲洪流高下迷涯涘
人思樹杪棲舟向城門艤粒米與寸莖無以活婦子
及茲不存恤將恐成轉徙求食或走險草澤憂方始
余聞初驚嗟迴思額有泚竊祿曠天工其咎將焉委

長揖謝客言何以助爲理客去雨復來黑雲低有咫

其二十二

躬新力不任未敢談雲山坐此滯榮祿局踏逾壯年
雖無羨魚意結網已臨淵故業日蕪廢荆杞生良田
一身如旅人趨走塵土間今晨涼風至黃葉墜我前
寒螿響高林歸鴻掠秋烟物換逐馳景催人成華顛
微軀匪金石胡不謀自閒蹙蹙事浮名爲問誰使然

右和陶韻

除夕 二首

除夕倘無詩一年亦虛度凍研與枯毫天成卒歲具
兩曜無停輝浮生樂馳驚知非忽已晚朱顏易成素
四十復增二百年真且暮惕然念行休老訓在止足
其二

今年多暇日遊咏諧夙耽檢點舊詩草去歲僅十三
生平得如此貧老亦復甘况乎竊祿秩世味久已諳
於物既無裨虛名諒難堪坐嘯送殘景居諸祇懷慙

題管節婦曹氏卷

新安人高似斗司寇爲傳
丙午

古井不生瀾貞木不萎霜齊一結大義肩荷在倫常

中道罹乖割之死矢同行顧茲仰俯累抑志稱未亡
恤緯戒甘旨畫荻授詞章青燈幾十載冰肝蕝蘖腸
二老各得所雙雛待飛翔持此謝良人含笑歸泉鄉
淳風表畿輔淑質鍾琳琅大家遺女訓苗裔傳芬芳
爲善未食報論者無心傷吾聞崔山南易世門逾昌

題彭哲人乃祖名宦卷

溧陽人前白水令
有跋

彭子何方來衣帶秦川土一卷出囊中津津爲乃祖
記之者吾師其言何覩縷乃知南洲公循良升豆俎
白水古彭衙厥地隸三輔馮翊屏西京拱衛稱左股

彭公作令時吏治猶近古烟幅號宜人耕鑿田疇伍
吠犬足生菴千村夜開戶卽今百年餘來暮歌如睹
畏壘得庚桑尸祝專祠宇伏臘潔明禋絃歌雜鐘鼓
四世有聞孫過庭思政譜間關數千程先型尋舊部
父老歡然迎謂我昔明府崇祀與豐碑遺愛歷可數
道故若家人倒屣徧環堵揮涕眺山川感慨生仰俯
吾觀昔循吏龔黃及卓魯或生享榮名或沒延世祐
天心晰報施往復如張弼古人勉爲善責效羞市賈
彭子凌雲質一時嗟鍛羽小屈會大伸蓬累何足憚

公侯世必復達人克繩武三代直道存書此勸乳虎

彭子哲人客京師逾二年所蓋數見之而未及深
談也頃過余蔬圃語小洽出斯幘索題乃知哲人
久客不歸繫此之故南洲公政蹟與其邑人甘棠
之愛汾陽先生言之已詳余無庸贅述不揣輒成
韻語一章紀事以塞哲人之請他日復過汾水其

以質之先生當必有以正其紕類也

哲人名士俊
戊戌進士

題顧文學小像

水部見山君祖華亭人
丁未

先生起東南扶輿萃清淑沈酣六藉中韋布懷珠玉

舉比正師席春容資誦讀經術蔚彬彬匠門無曲木
著書惠來學名山藏簡牘白駒不可招遐心在空谷
異代識聞孫家學紹徽躅毫素見儀刑拜手衣冠肅
送法黃石之江南
霜風吹河梁枯柳折難舉別竿凝寒醪合意咽無語
委形逐塵囿聚散等羈旅君去領名藩坐聽歌衣褚
採時急卑之微言偶牧圉黃虞道稀闕稷禹固所許
旣以謝蒼生亦以荅古處

雜詩

十首
戊申

五月旱太甚融風氣如焚北陸淹畏景極目無纖雲
一陰將戒候化機失網緼友紀未敢逸奠瘞亦已勤
三復雲漢詩先正胡不聞

其二

其雨乃恒風虛占亦云數今宵始成霖平明已霑渥
大塊蘇羣生歎烝散如濯枯苑翻覆間天澤豈遼邈
誰云感召遲和氣圍扉覺

是年因旱錄囚
六月大雨

其三

喜雨方未已愁霖復繼之二氣偶乖蹇翕闢俱非宜

人情本無厭天意良因茲哀此下土愚徒然生怨咨
造命有恒理譙讓復奚辭

其四

朝看雨及暮夜聽雨達晨晨暮不復辨將爲風波民
忽忽牛女夕昏墊欲盈旬鳥鵲濕不翔黃姑隔天津
何當叩靈匹一爲籲高旻

其五

大水冒城郭前史不恒書何爲治平世黔首愁爲魚
復聞齊魯間異變驚堪輿水土失其職昭戒良匪虛

策免有已事撫躬媿焉如

其六

娟娟月吐雲溥溥露凝砌今夕復何夕再覩天光麗
回思淫潦時將謂傾大地彼蒼實好生怒渝不終遂
誰能炳幾先恒爲未雨計

其七

晨風西北至商吹生林臯旭日斂朝霞始覺天宇高
策杖步壟畝新涼入輕袍念彼田家計力作終歲勞
藿食更多憂何心析秋毫

其八

鑿池貯清泚種彼蒲與荷雨露所滋息受氣無隆窳
亭亭出翠葆灼灼揚紅葩采之將誰貽伊人隔蒹葭
芳妍固為好歲晚當奈何

其九

神龍行天上變化無端倪首尾不可見潛躍理無睽
胡為遊潢潦出沒如鰕鯢平陸劃洪河萬姓困塗泥
伐木近燕說鱗孽度可稽

是歲河南山左皆報龍鬪俗傳龍伐木

其十

兩儀雖定位升降憑氣機陰陽所鼓盪水立山能飛
同時數千里黔雷播天威厄會古有然聖賢莫能違
世無劉子政誰能察其微

送李召林假歸桂林

巳酉

桂嶺高嵯峨桂水清揚波其間所鍾者磊落而英多
揆藻翔天庭鳳羽歸絃羅青蒲聞讜言仁風扇巖阿
高者增其厚清者釀其和睠焉懷松楸此離傷如何
蕭條朔氣寒驄馬鳴玉珂贈處希古義用陳勞者歌

南苑雜詩

七首 庚戌

不踐城南途歟焉已十載豈惟日月積似覺阡陌改
荒畦接村墟居人幾家在久旱麥禾焦耕者方憂餒
長風吹驚沙羸馬循殘壘繚垣啟紅門紺宇奉真宰
曾識經始年金碧餘光彩石梁隔流水濺濺濕蘭茝
徒御遠相失行行意彌怠筋力非當年馳驅增歎慨

其二

憶昔順治中頻隨 翠華至組練閱七校羆虎擁干
騎蒐苗順時令縹緗勤講肄非徒武備脩兼亦崇文
事紛紛玉堂賓接跡交戟侍夕火聯廬幕朝霜共鞭

轡而余廁羣彥幸免周旋墜麗澤資儀刑珥筆依行
次俄驚鼎湖變遂灑蒼梧淚 恩深百未酬號弓徒
捨地迄今十年來有覩猶在位重來睹陳跡風景河
山異青雲皆新交故人盡凋瘁欲與話當年往事誰
省記惟有宮牆樹顏色轉蒼翠

其三

蕤賓將應律畏景長如年遺廬僅容膝心閒形晏然
晤言苦無人聊與古周旋把卷欣有得沈思冥言詮
禺中炎歊盛赫日俄當天揮汗欲成漿安能親簡編

徒倚無所事拋書仍高眠誰爲馬相如雕輦進新篇
其四

永日幸已暮飄風亦時休夜明始生魄團團東南陬
浮烟散赤霞炎氛夕方收河漢不可見大火當天流
須臾涼颺來侵肌凜如秋在野無籬籬寒燠憑所投
攬衣望四荒天宇曠難周箕畢自殊好衆願何以酬
驕陽亢微陰不再豈無由坐深直廬靜清漏聞悠悠
其五

融風吹南陸獵獵帷帳鳴披沙一開眼油然見雲行

沈沈黯西山遙遙接高城濃陰蔽朝旭曉起聞雨聲
茲聲一何美能使珠玉輕甘澤雖未足亦可濡植莖
播種盡人事種稂均西成凡草固易滋蓊然乘怒生
晚霽看野色一洗塵襟清素餐愧宵旰舍郊廛省
耕

其六

章甫適於越途人笑其迂赳赳貔貅場何事來腐儒
角技無所長日挾一冊書吟哦送晝景坐起時卷舒
兒童顧之笑無乃非吾徒舍此徇俗好結習良未除

亦知從禽樂卽鹿懼無虞

其七

西北有崇丘策馬陟其巔長風送白日振衣何翩翩
突兀夏雲起仰見羣峯連曠焉豁心目萬象森我前
茲地盡靈囿芻蕘隸中涓週墻接郊墟禾黍被長阡
時雨未肯濡首種付石田回矚瞻宸居雉堞紛祥
烟鬱葱氣佳哉端拱思履旃晏安胡可懷習勤古有
然載馳以忘暑興盡乃言旋

